



Bentiaraq Ottosen

UPA 2026/56-1

Atassut

10. Juni 2026

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 2/2025-mik Inatsisartut ilaliinissaannik siunnersuut: Nunat Avannarliit Killiit Siunnersuisoqatigiiffiata Savalimmiuni naalakkersuisunut, Kalaallit Nunaanni naalakkersuisunut Islandimilu naalakkersuisunut kaammattuutigaa,

- Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut, internettimut nalunaarasuartaatigullu attaveqaatinut, akisussaasut naapissasut Atlantikullu avannarpasinnerusortaani attaveqaqatigiinnermut internettimullu attaveqaasersuutit inuiaqatigiinnut pingaarutillit, minnerunngitsumik imaatigut kabelit qaammataasatigullu attaveqaatit, isumannaassusiat oqallisiginiarlugu,
- Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut akisussaasuusut naapinnerminnut atatillugu misissussagaat Atlantikup avannarpasinnerusortaani nunat imaatigut kabelii qaammataasatigullu attaveqaataat eqqarsaatigalugit sillimaniarneq upalungaarsimanermullu pilersaarutit pillugit suleqatigiinnissamut tunngavissaqarnerisq.

(Aallartitat Siulittaasuat Pipaluk Lynge)

Atassut isumaqarpoq attaveqaatit pisariaqavissut qanoq inuiaqatigiit akornanni sillimaniarnikkut upalungaarsimanikkut pingaaruteqassusaat nunatsinni annertunermik pingaartuusut. Soorlu Tasiilami attaveqaatit pisariaqartinneqartut nukittorsarneqarsinnaanerat eqqaaneqarsinnaasooq aamma pisariaqartitsineq aallaavigalugu nunap immikkoortuini inoqarfiit isorliunerusuni taaneqartartut eqqarsaatigineqarsinnaasut pitsanngorsaavigineqarlutillu.

Nunatsinni suliaasaqarpugut, attaveqaatit inuiaqatigiinni atorineqartut soorlu qaamataasatigut oqarasuartaateqarnikkut attaveqaatit eqqarsaatigalugit imaatigut kabelit ataatsimoorussamik inuiaqatigiinni ingerlatsinnermut tunngavissut aalajangiisuupput.

Atassummiit isumaqarpugut attaveqaatit pitsaasut inuiaqatigiit akornanni aningaasarsiornikkut periarfissat annertusartaraat. Assersuusiussaguma pingaartuuvoq suliffeqarfiit, inunnik kiffartuusiviit, peqqinnissaqarfik kiisalu inuussutissarsiortut digitaaliusumik periarfissaat ineriartortinneqarsinnaammata. Taamaalilluni attaveqaatit pitsaanerusut suliffissanik nutaanik pilersitsinissamut aamma periarfissaqartitsilissapput.

Atassummiit maluginiarparput aamma pimoorullugu oqariartuutigaarput inuiaqatigiinni kiffartuusinerit pingaarutillit eqqarsaatigalugit ineriartortitsinissaq sukkulluuniit avaqqunneqarsinnaanngitsooq. Attaveqaatit pisariaqartinneqartut pitsaasusaat qaffassisooq anguneqartariaqarpoq, uani Tasiilaq aamma Ittoqqortoormiut nunaqarfittaalu pineqarput, tassuunatigut nukittorsaanermut pingaarutilimmik peqqinnissaqarfimmut aamma ilinniartitsinnermut kiisalu pisortat ingerlatsinnerannut iluaqutaasussamik aaqqiissuteqarnissaq



pisariaqarluinnartuuvoq. Qarasaasiatigut attaveqaatinut ingerlatsineq killeqarpat imaluuniit unamminartoqarpa, inuiaqatigiinnut kiffartuusinerit unamillernartumut inissisimajuaanassapput. Tamatumingga aaqqiissuteqarnissaa pingaaruteqartoq oqariartuutigaarput.

Atassummiit eqqaangitsoorusunngilarput sillimaniarnikkut aammalu upalungaarsimanikkut tunngatillugit ataveqaatit pingaaruteqarput, soorunalimi aamma atuisuusunut pitsanngorsaataasinnaasut aamma pinngitsoorsinnaanngilagut oqariartuutigissallugit. Oqariartuutigaarput sillimaniarnermi nunatta avannaarsua nuna eqqissisimatitamik taaneqartartoq eqqarsaatigalugu ajunaarnersuaqassappat, imaluuniit sumiiffinni taaneqartuni Ittoqqortoormiini aamma Tasiilami inoqarfiit qanitaaniittut aamma ajunaarnersuarnik eqqugaasappata periarfissat annikitsuinnaat atorineqartut inuit isumannaatsuutinnissaannut inatsit killiliussaasoq unioqqutinneqaratarsinnaanera Atassummiit ernumagalugu aaqqitassat aaqqinneqarnissaat nunat avannarliit killiit peqatigalugit suleqatigiinneq ataqatigiittoq angusariaqaripput.

Taamaattumik Atassutip naleqartitaani pingaaruteqarluinnarpoq inuk tassuunatigut inuiaqatigiinni tamakkiisumik ineriartortinneqarnissaa tunngaviusoq. Pingaaruteqarpoq aningaasarsiornikkut patajaatsuunissaq, ilinniagaqassutsikkut qaffasissumik kinguneqartitsinissaq, taamatullu aamma inuiaqatigiinni peqataatitsinikkut kiisalu sillimaniarnikkut pingaaruteqartumik inissisimasoq.

Taama oqaaseqarluta siunnersuut akuersissutigineqassasoq innersuullugu inassutigaarput.